



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir\_yimyim



tir yimyim

TAPAK 8

**Hezbollah commander  
Sheikh Hammadi khaset**

**Borussia Dortmund-i coach Nuri  
Sahin mapa nungi anentsüogo**

VOL. XXII ISSUE NO. 99 (ADOK 99)

DIMAPUR

YANGTEPNÜ (THURSDAY)

AENJETI (JANUARY) 23, 2025

₹ 5.00

## Centre & ENPO tsüingda FNT tebilemstsü angatetteptsü imlar

**Kohima, January 22, 2025 (TYO):** Centre aser Eastern Nagaland Peoples' Organisation (ENPO) tsüingda Frontier Nagaland Territory takhangba onük angatetteptsü ta Nagaland sorkari imlar.

"Ni angatetba agibo iba onük jungjunga jembia arudar aser parnok tsüingda ken o tarok ajak jembitepdar. Telok anaprongi nendaka inyaksü aser angatetteptsü imlar kechiyong taginüba ajakbo khen nung mangutsü" ta Nagaland government spokesperson KG Kenye-i ashi.

Olemtepba sülen India sorkari shisadangtsü aser asadangtsü atema mapang nungdaksü aser kasaji ENPO-ia nungdaksü ta pai ashi.

January 15 nü Chumoukedima district nung Centre, state sorkar aser ENPO tsüingda külem senden amending tebilemstsü onük tasen kar mesüra meimlai aliba telangzüba kar liasü. telok anaprongi legislative powers, financial aser judiciary

nung ajemdaker onüktem shisadangtsüla ta Kenye-i ashi.

Taoba nung MHA-i agütsüba onüktem state sorkari reprangdangogo aser shitak dang liasü. Centre-i ENPO dang nungi takhangba onüktem anguba sülen agizüktetba aser jembia otettsüba onüktem agitetogo ta pai ashi.

State sorkarisa Assam nung Bodoland ama tanga territorial councils den parnok ketdangtsüa aoba osang agitepdar. Nagaland ya parnok state ama masü aser ENPO-ia parnok Sixth Schedule kübok madentsü ta shiogo ta Kenye-i ashi.

"ENPO-i Nagaland nem agütsüba Arrla 371A yunür aser tesüba nung inyakba system beshinür. 1964 nungi 1974 tashi Nagaland ya regional council ka kübok ketdangtsüa liasü ajisüaka asenoki tang iba amaji 100% meinyaktettsü kechiyong iba mapangji balaka liasü" ta paisa metetdaksü.

Maparen tekaraba nung inyaka otettsü atema state sorkari mapang shia olemtep alitsü imlar ta Kenye-isa ashi.

## Nagaland sorkari Central Funds amajok mekümdaktsütsü ayongzüker

**Kohima, January 22, 2025 (TYO):** Nagaland nem Central funds agütsüba nungi Rs 500 crore tema ano magütsü aliba atema Nagaland sorkari tebilemstsü abener.

Tongtipang state department temi mapatong aika metembangba ajanga senotsü magütsür ta government spokesperson-i metetdaksü.

"Health and Family Welfare, Urban Development, aser Rural Development amala tongtipang department tem atema senotsü lezmükja lir saka mapang shitak nung mapatongtem metembangtetra senotsü mangutsü akok" ta Nagaland government spokesperson aser Power & Parliamentary Affairs Minister K. G. Kenye-i ashi.

Bodbar nü Chief Minister's Office (CMO) nung cabinet senden ka amenba sülen pai osangbener den jembidang iba osang metetdaksü.

Cabinet senden nung iba onük benoka lemsatepogo aser tanüingba Rs 1200 crore nungi Rs. 500 crores indang mapa inyaksüla aser ibaji tongtipangsa Health aser Rural development department temi inyaksüla ta pai ashi.

"Iba ya asenok atema sen aika lir. Fund nungi senotsü teimba ka lezmüktsüogo saka mapatong meilungi inyakba ajanga senotsü

aika magütsü lir" ta Kenye-isa ashi.

Mapatong teimba ka health sector nung lir aser iba ya rural tesemtem nung health and wellness centers yanglutsüba lir. Kiojen maliba ajanga medical centers karbo para kidang lapoka lir anungji village councils aser district ketdangtsürtem den amalitepa tekaratiba nung mapa inyaksü nungdaker, ta pai ashi.

Senotsü ya medical centers tejen nungi wellness centers akümtsüba den rural tesemtem nung medical equipment tajungtem alitsüba asoshi lir ta Minister Kenye-isa ashi.

Senotsü timtem ajanga grassroots workers nem, itasen magütsütetba amala mapa kar nung tetsükdaksü ajurua liasü saka itasen atema fund diversion asüba ajanga tebilemstsü koktetogo. Central guidelines ajanga iba mapa nung funds amshitsü temelaba agütsür, ta pai ashi.

Nagaland nung küm 20 tashi lir ang yaküm urban local body elections agiogo saka Urban Local Bodies (ULBs) nem mapatong balala anendaka aliba inyaksü mapa lezmüktsüogo. Sorkari item maparen tekaratiba nung tembangtsü atema parnok den külemi yaritepdar ta Kenye-isa Urban Development Department indang olen ka ashi.

## 2025 nung Naga yimten latettsü imlar: Minister Kenye

**Kohima, January 22, 2025 (TYO):** 2025 küm ya yimjung aser tejakleni aoba küm ka asütsü aser küm aika mebenteti aruba Naga yimten tebilemstsü latetba küm asütsü ta Nagaland sorkari imlar.

"Onoki osangkakettem nungi parnok Delhi-i aoba angazükogo. Iba ya yaküm September ita state sorkar aser Naga civil societies tsüingda külem senden ka amenba sülen India sorkari parnok Delhi-i jaok aser anogo ishika olemtepogo" ta government spokesperson KG Kenye-i ashi.

"Yamaji süaka maparen tejakleni aoba mangur saka parnok tsüingda onük karbo lemsatepogo. A. K. Mishra-i January 15 nü Chumoukedima nung ENPO den ajurutepba sülen NSCN-IM general secretary Th. Muivah den ajurutepa liasü" ta pai ashi.

Telok anatsülen maparen shitak dang odar aser state sorkari ajuruteptsü atema mapang ka latettsü aser osang metetpelatsü ta Kenye-isa ashi.

NSCN-IM tanishir Muivah-i olemtep junga moutetra aremi aitsü ta ashiba sülen Chief Minister Neiphu Rio aser par cabinet züngsemtemi Union Home Minister Amit Shah den



K G Kenye

ajurutepba indang asüingdangdang "Delhi nung Home Minister den ajurutepbaji nübortem matatetba osan sangoktsütsü aser Centre indang tebilemsta metettsü atema liasü" ta Minister Kenye-i langzü.

Ajisüaka state asem nung election tagidak asüba agi Home Minister-i tanga mapang ka nung ang olemteptsü mepishia liasü ta paisa shisem.

Centre sorkari Indo-Myanmar arrtsü nung kilometer 10 telongtet nung free movement regime (FMR) agienba den Nagaland nung Protected Area Permit (PAP) system tanaben benokba meyipa reprangshitsüla ta Nagaland sorkari metetdaksüogo.

Nagaland sorkari Nagaland tenokdangba tasen magizükba metetdaksüogo ajisüaka Ministry

of Home Affairs (MHA) mesüra India sorkar nungi iba atema telangzüba kecha mangu lir ta government spokesperson Kenye-i ashi.

"Nagaland den kidanger state tem nung policy kar inyaka alitsü akok saka Nagaland tensa ya khenyongi balaka aser putiotsü nung ajemdaker mapa inyaksüla. North East ajunga nung Nagaland ya political nerve centre ka lir aser maparen aika nung tiyongtsü ka lir aser Centre-ia iba ya kanga junga angateta lir" ta Kenye-isa metetdaksü.

"Centre-i system ka renemdar aser iba ya Nagaland nung aser talisa Noklak o Mon nung kanga tapet asütsü akok" ta paisa ashi.

Nagaland nung Protected Area Permit (PAP) tanaben benokba atema sorkari Centre dangi shidi zülüogo. Nagaland nung senotsü peria mangur aser iba jagi tourism revenue nung metaloka lir, ta Kenye-i ashi.

Hornbill Festival ya tourist sentong ka lir saka PAP benokba ajanga iba nung timtem ajurutsü akok aser international tourists kanga ajema akümtsü. Security tsütsü lendong aliba agizükker saka Centre-i tesem ka balaka senzuka mayutsüsa mapa tajung kar inyaksüla ta paisa ashi.

## Beto Bachao Beto Padhao küm 10 ajungba sentong agi

**Dimapur, January 22, 2025 (TYO):** Mission Shakti, Social Welfare Department kübok Beto Bachao Beto Padhao (BBBP) küm 10 ajungba tenüing nung sentong ka January 22, 2025 nü agiogo.

Iba sentong nung Commissioner & Secretary, Social Welfare, Martha R. Ritse, IAS-i alaketa jaoker ka ama shilem agia liasü.

"Tanur tetsür ka ya tongtipang ta asüba yimya aser tangatetba melenshitsü kanga tongtipang lir. Linük nung tanüingba tesemtem dang nungi Naga loktiliba nung tetsür tashi itdaksüba tangatetba

kanga agi tajung lir. ajisüaka, tebur o tetsür ajunga kasa ta asütsüsa ano tilateri temetongshitsü kar lir" ta Martha-i ashi.

BBBP ya tashi itdaksüba scheme ka dang masü saka loktiliba nung tetsürtem wadang ajak nung renloka aotsü atema lir. Anungji department balala yaritepa iba scheme nung aliba nükjidongtem tongtetsüsa inyaka aotsüla, ta lai ashi.

Iba scheme kübok 1000 programs shi ka agiogo aser item ajanga takok tulu nguogo. India nung iba scheme kanga junga inyakba tematiba state pungu

rongnung Nagaland densema lir, ta Martha-isa ashi.

Prime Minister, Narendra Modi-i 2015 küm Sonapat, Haryana nung BBBP scheme tenzüktsü. Iba ya Ministry of Women and Child Development, Ministry of Health and Family Welfare aser Ministry of Education külemi yaritepa tenzük ta Social Welfare & Mission Director, Mission Shakti, Secretary Bodeno S. Colo-i ashi.

Nagaland district 16 prongnung iba scheme inyaker aser kümtem süia arudang mapa tajungba inyaka arudar ta Colo-isa ashi.

## Ao Senden-i NSCN (Khango-Hokato) dang ayimoktsür

**Dimapur, January 22, 2025 (TYO):** NSCN (Khango-Hokato)-i Aolemba Longkumer dang Micro and Small Enterprises Common Development Program (MSE-CDP) kübok koltem aliba indang cash vouchers aser invoices meshiba atema süoki ia bilemer aser pa anema inyaksangshiba anenang ta Ao Senden-i tanü metetdaksüogo.

Iba sentong nung Aolemba Longkumer ya shilem ka dang lir aser iba sentong takok mesüra

tamakok atema pa dang masü saka parnok külemi tenüing agitsü. Talisa Aolemba aser bangdak department-ia iba sentong indang osang tejangja agütsüogo ta Ao Senden-i ashi.

Iba maparen nung contractor ji Aolemba dang masü anungji NSCN (Khango-Hokato)-i pa dak dang tenük yoka inyakba anentsüla. Naga yimten teloktemi tangatetba melii ozü sensotem dak tenük yoka timtem agütsüba odangbo meyutsütsü saka nungdakba mapa inyaksü ta Ao

Senden-isa metetdaksüogo.

Naga yimten teloktemi India sorkar aser Nagaland state sorkar nem ochimashi anema mapa inyakdakjang. NSCN (Khango-Hokato)-ia sorkar atema bushisüingdang telok ka ama meinyaksüla ta parnokisa ashi.

Nagaland sorkaria ozüing ketdangsubaren sülen anidaksüla aser government-sponsored schemes inyakba nung yimten teloktemi sensotem nem timtem agütsüba noktangtsüla ta Ao Senden-isa metetdaksüogo.

# Dimapur & Mokokchung nung BBBP kum 10 ajungba mungogo



Beti Pachao Beti Padhao campaign tenzükur kum ter ajungba benjongmung tenzükur Deputy Commissioner, Mokokchung indang Conference Hall nung January 22, 2025 nü sentong ka alidang Deputy Commissioner, Mokokchung, Thsuvisie Phoj-i ketdangsüra tenangzükba agidang tangokba noksa nung angur.

**Dimapur, Aenjeti/January 22 (TYO):** Beti Bachao Beti Padhao (BBBP) inyakyim tenzükur kum ter ajungba nungtem nung Dimapur District Administration aser Sankalp-District Hub for Empowerment of Women (DHEW) ajanga bike rally ka January 22, 2025 nü ayongzükba liasü.

Iba rally ya Office of the Deputy Commissioner, Dimapur nungi Stephen Nguilie, District Public Relations Officer, Dimapur ajanga tenzüktsü aser Office of the Deputy Commissioner, Chümoukedima nung tembang.

Iba sentong ya "Save the Girl Child: Educate the Girl Child yimyim temaba jenjangi ajungkettsü nükjidong nung aser January 22, 2025 nungi March 8, 2025 tashi agitsü aliba campaign nung shilem ka ama agia liasü.

Dimapur nungi iba rally nung riders 30-i shilem agi aser parnok ya R.E Brothers Nagaland, United Riders Motorcycle Club, United Royal Riders Motorcycle Club, Nagaland Motorcycle, Flying Falcons Motorcycle Club, aser The C.R.E.W Motorcycle Club

ama nungtugu motorcycle clubs tem nungi züngsemtem liasü.

Chümoukedima nung parnok ya Deputy Commissioner, Chümoukedima, Polan John, NCS ajanga agüzüka Ikali Wokhami, DMC DHEW, Mission Shakti lenisüba kübok sentong tatsüka agia liasü.

Sentong nung DC Chümoukedima ajanga bikers clubs temi BBBP kum 10 ajungba bilemteta rally nung shilem agirtem dang pelaba lemsatop aser tetsür chanu kumzükba ayutsü aser shisaliok agütsütsü asoshi awareness agütsüba tenüng sanga liasü.

Paisa District Administration aser Sankalp-Mission Shakti lungjemer January 22 nungi March 8, 2025 tashi sentong balala ayongzüktsü aliba indang lemsatop aser yangji schools, tetsür telok aser local authorities temi shilem agitsü ta ashi.

Iba sentong nung Polan John-i Menstrual Health Manual for Women and Girl semzüktsü aser District Hub for Empowerment of Women ajanga yangluba Feminine Hygiene Kits tem lema agüja liasü aser Seyievilie Pfukri,

EAC HQ ajanga ketdang süa pledging ceremony aser signature campaign agia liasü.

Beti Bachao Beti Padhao kum ter ajungba benjongmung tenzükba sentong ka Deputy Commissioner, Mokokchung indang Conference Hall nung January 22, 2025 nü District Administration aser Sankalp: District Hub for Empowerment of Women (DHEW)- Mission Shakti, Mokokchung ajanga ayongzükba liasü.

Sentong nung Deputy Commissioner Mokokchung, Thsuvisie Phoji ajanga jembidang, iba sentong dak sendakba nung aser district aser state ya linük indang nükrangdong ka amai lir, kechiaser lenla ajak nung asenok gender equality nung amendaka lir, ta pai ashi.

Pai iba yimya maneni amshia aotsü nungdaker ta ashi aser iba mission nung tali shilem agitsü nüburtem dang ayongzükba liasü.

Iba sentong nung Deputy Commissioner, Mokokchung ajanga ketdangsüa tenangzüktep agia liasü, Putuchiba Walling, Gender Specialist (DHEW) ajanga o tatsüka jembu.

# Kohima nung Republic Day mapang tesem balala semdangtsü lemsatsü

**Dimapur, Aenjeti/January 22 (TYO):** Deputy Commissioner, Kohima indang office ajanga January 26, 2025 nü Kohima District telungzük nung 76th Republic Day mapang NGOs aser Clubs temi teshimtet Homes aser Institutions semdangtsü lemsatsüo.

Iba anogo Gorkha Public Panchayat ajanga State Mental Health Institute semdangtsü aser Puliebaze Club ajanga Tabitha Enabling Academy

semdangtsü. Old Age Home ya Indian Red Cross ajanga semdangtsü aser Masjid Committee-i Kohima Orphanage & Destitute Home semdangtsü, ta sangdong ajanga ashi.

District Jail ya Nagaland Contractors & Suppliers Union-i semdangtsü aser Periezie nung aliba Bright Morning Star Orphanage ya Kohima Chamber of Commerce & Industry ajanga semdangtsü.

Angami Women Organisation-i Cherry Blossom semdangtsü aser Rotary Club-i Jo Foundation semdangtsü. Tatamsa Classic Club ajanga Cradle Ridge semdangtsü.

Item NGOs aser Clubs temi item tesem semdangba indang Action Taken Report agütsütsüla aser item report nung ajemdaker commendation certificates agütsütsü, ta Deputy Commissioner, Kohima indang sangdong ajangasa ashi.

# Economics and Statistics Department ajanga metetdaksür

**Dimapur, Aenjeti/January 22 (TYO):** Nüburtem nem manually agütsüba birth and death certificates tem Agencies aser Institutions kar nung magizükur ta osang angazükur, ta Department of Economic and Statistics ajanga sangdong ka ajanga ashi.

Registration of Births & Deaths Act 1969 (Amended in 2023) indang Section 17(3) nung electronic mesüra danga yimya ajanga agütsüba birth certificates ya nisung ka asoba anogo aser tesem jangjatsü, kakat reju nung admission agitsü, driving licence agütsütsü, voter list yanglutsü,

kiyimba tenüng zülüoktsü, sorkar mapa nung anioktsü, passport agütsütsü, Aadhaar number agütsütsü aser Central sorkari shia aliba atema amshitsü ta shia lir.

Online ajanga Birth & Death Certificates amshitsü asoshi Department of Economics & Statistics, Nagaland ajanga Births & Deaths atema 2022 kum online registration tenzükogo.

Tang asoshi iba service ya district headquarters 12- Kohima, Dimapur, Chumukedima, Wokha, Zunheboto, Tuensang, Mon, Mokokchung, Kiphire, Longleng,

Peren aser Phek nung dang urban jurisdictions atema angutsü aser state nung urban aser rural registration units ajanga nung births and deaths online registration ya noklem lemsar lapoktsüyonga aotsü, ta sangdong ajanga ashi.

Anungji nisung ka asoba anogo aser tesem jangjatsü asoshi computer nungi agizükba certificates tem den Registrars of Births and Deaths ajanga item certificates manual (teka agi zülur) agütsüba ya maneni amshitsü, ta Department of Economic and Statistics sangdong ajangasa ashi.

# Mejangjabanisung tasü mang ka nguteta lir

**Dimapur, Aenjeti/January 22 (TYO):** Railway siding area, Dimapur nung aliba overbridge (FOB-1) tsünglanglen nisung tasü mang ka nguteta lir ta January 22, 2024 nü Station Manager, NF Railway Dimapur nungi tezüluba ka Dimapur Police dangi arua liasü.

Iba osang nung ajemdaker duty nung alirtem iba tesemi arsanga ao aser mejangjaba nisung (non-local) tebur arishi kum 45-50 tsüngta tasü mang ka foot overbridge (FOB-1) tsünglanglen ngutet.

Nisungba ya shiranga asü südi ta temulung melemeti lir. Ozüing agi melaba maparen ajak

tembangba sülen tasü mang ya PM examination aser jangjatsü atema District Hospital Dimapur indang morgue nung bener oa yua lir.

Iba nisung ya long pant sentsü tanak, tula sentsü tanen ka aser temesüing aser pui-puier rapurasa semer liasü aser pa tereprangtsü sentsü tammang lir.

Kibur/kinunger/tembar temi Officer-in-Charge, Govt. Railway Police Station, Dimapur den Mobile No. 7085055021 ajanga tongteprateptsü akok, ta Dimapur Police sangdong ajangasa ashi.

# Kala Ghoda 2025 nung IPRS Stage ayongzüktsü



**TETSEO SISTERS**  
SINGING SISTERS FROM KOHIMA, NAGALAND

**Dimapur, Aenjeti/January 22 (TYO):** Indian Performing Right Society Ltd. (IPRS) ajanga Kala Ghoda Arts Festival den lungjemer 2 buba IPRS Stage ayongzüktsü lir.

IPRS Stage ya India nung musical heritage asoshi lir, kong monguteti aliba sempet aser musical genres asoshi sapang agütsür aser linük indang sobaliba tali shisangdaksür.

IPRS Stage ya January 26 & 27, 2025 anogotem agitsü sentong lir.

January 26, 2025 nü Nagaland nungi Tetseo Sisters ajanga iba sentong nung

Chakhesang Naga kin indang ken ajanga shilem agitsü.

Parnok indang kensü ola den sübosolemsü tebour tajung agir Chakhesang Naga kin indang Li ken Chokri oshi nung atentsü.

Tasüing, January 27, 2025 nü Barmer, Rajasthan nungi Desert Kats ajanga Langa kin yimya nung ken atentsü. Iba telok yagi Sarangi, Khartal aser Algoza amala oset balala amshia atener.

Sentong ya Cross Maidan, Kala Ghoda, Mumbai nung nikongdang 5:30 ako nung tenzüktsü aser 6:15 ako nung tembangtsü.

# Old Age, Widow aser Disability Pensioner atema metetdaksür

**Dimapur, Aenjeti/January 22 (TYO):** Mokokchung district nung National Scheme aser State Schemes kübok Old Age, Widow aser Disability Pensioners tem shirnoksa November 18, 2024 - December 9, 2024 tsüngta 2023-2024 indang pension teyari magizükü ali, parnoki tekeratiba nung District Welfare Office, Mokokchung nungi office lapola alidang anepdang 10:00 ako nungi nikongdang 2:00 ako tsüngta arua agizüktsüla, ta District Welfare Officer, Mokokchung, I Mangliyanga ajanga sangdong ka nung metetdaksü.

Directorate of Social Welfare, Nagaland, Kohima ajanga tuyuba ama, teyari agitsüpur temi NSAP portal nung inoktsü atema parnok indang

Date of Birth tejangja aser Contact Number agütsütsüla, anungji shirnokisa Date of Birth aser Contact tejangja magitsüi alirtemi January 31, 2025 tashinung agütsütsüla, ta sangdong ajanga ashi.

Maneni Active Bank Account alirtem nem pei indang Bank Accounts nung tsünglanglen shia aliba anogotem pension benefits inoktsüo:

1. NStCB Ltd - 30-10-2024
2. HDFC - 01-11-2024
3. Axis - 01-11-2024
4. Bank of Baroda, Ungma - 02-11-2024
5. Indian Bank - 04-11-2024
6. IDBI Bank- 05-11-2024
7. SBI- 08-11-2024
8. Canara Bank -13-11-2024
9. CBI Mokokchung -14-11-2024
10. CBI Kubolong -14-11-2024.

# Quad senden nung Jaishankar aden



January 21, 2025 nü Washington D.C nung Quad Foreign Minister tem senden nung External affairs minister, S Jaishankar (abelen nungi tanabuba) den US, Australia aser Japan Foreign Minister tem tangokba noksa nung angur.

**New Delhi, Aenjeti/January 22 (Agencies):** Donald Trump-i tang agi tanabenbuba US Tir tenangzükba agiba sülen tang mezüing Quad Foreign Minister tem senden nung External affairs minister, S Jaishankar aden.

Mongolbarnü Washington D.C nung Quad foreign ministers senden nungji US, Australia aser Japan linüktem nungi Foreign Minister tem-a aden.

Jaishankar-i X ajanga, "Tanü Washington D.C nung Quad foreign minister tem senden takok ngua menogo. Senden ayongzükba atema secretary Marco Rubio dang pelar aser shilem agir FMs Penny Wong aser Takeshi Iwaya danga pelar. Trump Administration tenangzükba agiba sülen ghonda ishika tsüingda Quad FMM

senden amen. Iba ya ajanga züingsem linüktem atema foreign policy ya tongtimbang ta kuli sayur," ta metetdaksü.

Paisa, "Onoki Indo-Pacific teladak asütsü, tashi itta alitsü aser azükarutsü atema lenla balala nung o lemtepogo. Taliba shisadanga külemi amalitepa inyaksü bangjemogo. Mejangjaba lima ka nung tanü iba senden ajanga, Quad-i alima ajungtsü atema maneni inyaksü, ta osang tejangja agütsür," ta metetdaksü.

Quad senden tembangba sülen Quad foreign minister temi külem sangdong ka ajanga, taküm India nung lenirtem senden atema renemshitsü asoshi tongti ketdangsertem maneni senden aika amentsü, ta metetdaksü.

"Onok, US secretary of state, Australia, India aser Japan

nungi foreign minister tem tanü Washington DC nung senden mena Indo-Pacific teladak asütsü, ozüing alitsü, democratic inyakyimtem alitsü aser litsü temeden kümzüksü atema bangjemogo," ta külem sangdong ajangasa metetdaksü.

Quad telok nung züingsem linüktemji India, Australia, Japan aser United States lir.

Taoba US Tir, Joe Biden administration mapang nunga Quad senden aiben menogo. Item senden nung China sepaitemi Indo-Pacific nung, talisa South China Sea nung tali ambangyima inyakba atema jembia aruogo.

Quad linüktemisa supply chains aser tongtimbang infrastructures kümzüksü atema cybersecurity tsütsü amalitepa inyaksü bangjemogo.

# Maharashtra nung train agi passenger 8 tsükset

**New Delhi, January 22 (Agencies):** Bodhbar nikongdang Maharashtra state kübok Jalgaon district nung train kati passenger 8 tsüksetogo.

Iba lendong ya nikongdang 5:00 ako meta Pachora station anasa atalok.

Pushpak Express train nung mi adokdar ta olulu prokba sülen nisung kari 'emergency chain'

nung atsüba agi train ji ajungbena anendakja liasü. Iba mapang nungji train nung alir kar tetsübu nung train nungjagi pungzükba aludang tejaklen aruba Karnataka Express train agi parnok tsükset.

Kasa lendong nungji nisung trok yiruogo, ta Central Railway officials-i metetdaksü.

Osangbener den jembidang

Nashik nung Divisional Commissioner, Praveen Gedam-i, iba lendong nung nisung ti süogo aser iba tatalokba bushisüingdang tenzükogo, ta metetdaksü.

Iba lendong atalokli ambulance ti den Railway ambulance aser van kar iba tesem jagi oa kümzükba maparen inyakba den yirurtem belena liasü. Iba tesem nungji SP, Additional SP, District Collector aser Divisional Railway Manager leniba nung kümzükba maparen inyaka liasü.

Divisional Commissioner, Praveen Gedam-i, "Onok iba tesem nungji lir. Onoki DRM aser Railway officials den yaritepdar. Administration-i akokba tashi yaridar," ta metetdaksü.

Train lendong atalokba osang angashia Uttar Pradesh Chief Minister, Yogi Adityanath-i tejashi lemsatepba den külemi ketdangsertem dang yirua alirtem nem medical treatment tajungtiba agüjang, ta tuyu.



January 22, 2025 nü Gurugram nung Haryana police-i Republic Day parade atema renemshidang tangokba noksa nung angur.

# 2030 matongdangsa India-i SDG health targets atongtsü: NHM

**New Delhi, January 22 (Agencies):** Bodhbarnü Union Cabinet-i tesüiba küm asem tsüingda National Health Mission (NHM)-i inyaka aruba asadangogo.

NHM-i Union Cabinet dang, 2030 küm matongdangsa Sustainable Development Goals (SDGs) ataloktsü atema India-i inyakdar, ta metetdaksü.

NHM-i Cabinet dang, India nunger public health jenjang tajungba akümtsü atema nübo taliba aniokba den külemi kanga tongtimbang tebilemtsü onüktem atema inyaker aser rongdak health tebilemtsü onüktem atema inyakdar, ta metetdaksü.

Tesüiba küm asem tsüingda NHM-i mashisa tetsütem aser tanurtem health tajungba akümtsü atema inyakba den külemi tashidak balala samatsütsü aser healthcare infrastructure ajungkettsü atema aika inyakogo, ta ketdangser kati metetdaksü.

Cabinet-isa SDGs nükjidongtem ataloktsü atema maneni taruba küm ana iba mission inyaksü temelaba agütsüogo.

"Sustainable Development Goals (SDGs) ataloktsü atema kanga meranga inyakdar aser nükjidongtem ataloktsü atema atemzükba aliba küm- 2030 küm matongdangsa India-i item nükjidong ataloktsü atema inyakdar. Tang NHM-i teinyakdak mapatem ajanga India nunger healthcare tsütsü temelenshi tulu adokogo," ta parnoki sangdong ka ajanga metetdaksü.

Bodhbarnü Ato kilonser Narendra Modi leniba nung Cabinet senden nungji ketdangsertemi 2021-22, 2022-23 aser 2023-24 kümtem nung NHM-i inyaka aruba mapatem metetdaksü.

Parnokisa Cabinet dang, tanur asodang asüba rate, kinü tanur asüba rate aser arrshi küm 5 ser tekübok tanurtem asüba rate kanga ajema kümogo; TB, malaria, kala-azar, dengue, tuberculosis, leprosy aser viral hepatitis ama tashidak balala indang programs aser National Sickle Cell Anaemia Elimination Mission densema mapatong tasen kar benoka inyakba metetdakja liasü.

2021-22 kümsük nung NHM-i healthcare workers lakh 2.69 tali anioksemogo; parnok rongnung general duty medical officers, specialists, staff nurses, auxiliary nurse midwives, AYUSH doctors, allied healthcare workers aser public health managers densema lir.

2022-23 kümsük nunga healthcare workers lakh 4.21 tali anioksem aser 2023-24 küm healthcare workers lakh 5.23 tali anioksema liasü, ta sangdong nung shia lir.

National Tuberculosis Elimination Programme kübok India nung tuberculosis agi shirangertem kanga ajema kümogo. 2015 küm India nung nütsüing lakh 1 shia nungi TB agi shiranger 237 liasü saka 2023 küm tashi nungbo nütsüing lakh 1 shia nungi TB agi shiranger 195 dang kümogo, ta NHM sangdong nung shia lir.

# Arvind Kejriwal-i Centre nem takhangba 7 agütsü

**New Delhi, January 22 (Agencies):** Delhi nung assembly election agitsü joko mapang ana nung lia Bodhbarnü AAP tongti lenir, Arvind Kejriwal-i middle class nüburtem nung rangloker manifesto ka saya, aser iba nungji central sorkar nem takhangba kar agüja lir.

Centre sorkari middle class nüburtem dang nungi saru tali agir, ta aija Kejriwal-i Ato kilonser Modi-i aniba sorkar nem takhangba kar agütsü.

"Taruba linük budget nung onoki middle class purtem atema takhangba kar agütsür. Tanü ni Centre sorkar nem takhangba tenet agütsür," ta pai metetdaksü.

Shisaliok budget nung tang shilem 2 lemezükja aliba nungi shilem 10 lemezükjang, private school fees ajemang, higher education atema subsidies aser scholarships tali agüjang; healthcare atema GDP nungi



shilem 10 indokang; sen lakh 7 tashi nung income tax magibaji sen lakh 10 kümjang aser nungdakba osettsüsettem GST saru agienang, ta takhangba agütsü.

Paisa, nija aser sorkar hospital tem naprongla nung teintet sensotem angati treatment agüjang, teintet sensotem dang train ticket jenjang shilem 50 tokang aser health insurance premiums nung saru agienang, ta takhangba agütsü. Delhi nung assembly elections February 5 nü agitsü aser February 8 nü votes azüngtsü.



## TIR YIMYIM YIMOBILEM (EDITORIAL)

DIMAPUR YANGTEPNÜ, JANUARY (AENJETI) 23, 2025

### Asenok kin adenshi meshiogo

**N**agaland telong yutsür tema dena tereprangtsüa sorua kecha mejungi kümogo aser yimten tebilemstsü agi tashiyim agi sen meshiba tebilemstsüang kümogo. Joko, ochi jembiri makoker aser ochishia inyakertem tesensakba akümba limajia Nagaland kümogo. Aji oda, ochishia inyakbajibo meshitak aser ochimashi inyakbabo shitak ta Nagaland nung o aser mapa ajak langkoshishi kümogo. Iba ama asen lima tensa tia ka nung asenok rongnung auyaa takar akümtsü tokteper, anungji ashioktsüteper aser shibai aser shirnoki tashiyim tuluba inyakteter, parnokji chubar. Atangji, asenok maden dak aser asenok malidak kecha tesema maka, ajak nung asenok dena lir, anungji item tamajung purtem rongnung asenoka dena lir aser item tamajungertemi amokmerenertem rongnunga asenoksa teimba aser asenoksa amok temerendaktsüba angashir aser angur. Aji oda, tamajungsa süaka tangartem dang nungi asenoksa tamajungba asüba agi tangari asenok amokmerener asü (?) mesüra asenok kanga tashi aser tasü mait aser kanga anükalemba agi tangari mezüngmeshir ? Item onüktem ya süoka shisalemsateptsü asoshi asenok yimkong khen adenshi meshiogo ta bilemer. Tsüngremibo asenok nem asenok tipdema alitsü asoshi dang masü saka tangar asoshi tajung tuluka inyaktettsüsa shisatsü aser tokolok agüja lir ser nung asenok mashimalu aser mangatetba agi, asenok yabo nisungchi kümer tangari asen dak mulunglemettsüsa aser akümtsübuttsüsa alitsüba ser nung, asenoksa mezüngmeshi tesüdaktsüba asütsüsa asenok aliba asenoki asenoksasa meteter. Aji oda, tanü asenoki ajuruba tensa tia ka nung anogo shia asenoki memetet, mangu aser mangashi ser asen nisung aser asen adianu karbosa tesem ka nung mesüra ka nung tangartemi amokmerena sen meshia alitsü aser bendangertem nema dena mezüngmeshidakja alitsü südi. Aji oda, ashiko, tangari tashiyim agi sen meshi tsübuba agi asen nisung aser asen adianu karbo pei kidanga mulung anisüngzüka meliteti alitsü akok mesrüa kima yimdong nunga sadoka mesenzüteti alitsüa akok. Tanü item asen nisungtem asoshi nüchiso nungdaker. Item tajemrep aser tetsübu tia nung alir aser adianutem nem tetsübu maliba nüchi taküm aser tejenokdak agütsüsbaji asen lokti aser asen kin tangatetba aser mapa asütsü tim. Pei pei alitsü aser tangar nem pei pei mezüngmeshidaktsütsü aser pei akatsü asoshi dang bilema alitsü asoshiho kin-a menüngdaker aser lokti-a menüngdaker. Aji oda, tanübo asenoka asen kin aser asen lokti alitsü nungdaker asü menüngdaker ta bilemdangtsüba mapang ka agi asenok menepogo. Asenokbo asen lokti nem tenla aser züngsem saru agütsür odang par sünütsü sang ta ser toktsütsü asü (?) mesüra asenok tenla aser saru jagi tashi kümer asenok khen longjemshitsü aser tamajung anema külemi nokdaktsü ? Item rongdak nungdak onüktem jembitsü asoshi memenui kenübosa asen nübor tesem tesadem ka nung meyi noklang junga adenshitsüsa senden ka ayongzük meshiogo ! Iba ama senden ka alitsü tanü alima tensa agi akanger. Ibaji mayongzüktetra asen kin tebangeri lapia bilemstsü aser nüchi ama mezüngoktsü. Iba ama senden nung madenerbo kin nungia jentoktsüsa asenok dak terenemba aser tangatetba alitsüla. Atangji, asenok lokti adenshir tangar majung jembitsü, tangar amaktsü aser tangar den meputeptsü indang jembitsü masü saka asenok longjemer, koba agi asenok tsübudaktsür aser koba agi asenok renloknüseta merenlokdaktsür, iba timtemji ageintettsüsa Tsüngrem dang shisatsü aser tashi meshia sentong tajung renemtsü bilema adenshitsüsa, asen kin khen adenshi meshiogo.

## OLEMSABANG

### AROGO SAKSALEMTSÜ YIMYIM

- Meyu Changkiri

Tanü arogotem tebilemstsü aika den tatsütepba aser tanela nung shirangba mapang ka lir. Iba shirangba temaitsütemji temulung shirangtsü ka, aser kanga dang jangjaa jungkai adoker: tema tazütsü Khristan zünba, theological institutions tiemba akümer saka item nungi adokba ajakbo imlaba ama tejangja Khristan taküm kuli magütsüteter. Telungjem maka, tenük merem tali, aser arogo nung politics tamajung nongpoka aita yimsüstepba tensa; amangbapur lokti nung kin o kin na bendangtepba amshidang Khristai tenyaba wadang tezülen doktsür. Aji oda süaka, Tsüngremer molunglemtetba aser Pai nangzükba marakzüi lir: Yisui ashi, "Na Peter aser iba lung manung ni kü arogo yangertsü; aser tasüba; aintemi ibaji makoktsü" (Mati 16:18). Iba yimyim ya amangbapur ajak asoshi repringshitsü, temulung ajak agi nangzüktsü, aser yanglushitsü tajaba ka lir. Asenok kong aibelenadok? Kati ka dak temeyong toloktsüba nung telangzüba tajung maka. Shidakba tanela nung tanaben asobaji kangasa tongtipang. Idaki arogo züngsem ajak telangzüksü ka ka lir. Yamaji, amangbapur ajak pei taküm repringshitsü aser yanglushitsü, aser Tsüngremi nungloktsüba pei tata shilem inyaktsü nungdaker.

#### Arogo Nung Shirangba

Arogotem kangshidaktsüba tebilemstsütem ya tasen aser balaka masü. Saka item tibilemstsütem tesashiba küma odaki. Jentipuri jogo tenüng agi dang Khrista dak amanger. Khristan ta ajaba taküm aika nung chichiba temelenshiba kuli mangur. Külem amangbapurtem den tesendaktep tajungba alitsü melena tema tazütsü amangba, ochi melena alima sobaliba nem kokdaktsüba aika adoker. Yisui item anema yamai ashi: 'Iba puri tebang agi ni akhüm tsübur, saka parnok mulungjang ni nungi talangka pila-a lir.' (Mati 15:8). Chichiba tamang jagibo temeli agi tenzükba dang nungi tajungba, alima yimya dang nungi temaba atendanga inyaker. Ibaji inyaktettsü asoshi Yisu Khrista den kija aser taküm tesendaktep tajung alitsü nungdaker. Arogo inyakyim aser arogo sobalibaa arubatemji metettsüji tongtipang, saka item ajak dang nungi alia tongtipangtibaji Tsüngrem O nem len anidaktsüba taküm kümdaktsütsüla. Temulungjang taroktiba nungi adokba tamang jungkai adokdaktsütsü arogoi mi tsükloktsütsüla. Kodang amangbapurtemi chichiba tamang nung aintsü memeranglir, tanela nung rajang akümba den arogopur rongnung alima tangatetba shisatsü aيتدaktsütsü sadem sadema leman lapoktsür.

Tanü arogo nung lenirtem ochimashibalen aibelendaktsütsü, aser arogo makdoktsü merangba tensa mapang ka tonga aruogo. Rongsen achaayangba nung ochimashiba, temeshi taküm melitetba, aser arogo nung tashiyim agi yimsü asütsü merangba ajanga alima dang arogo kuli ajema akümer. Tashiyim agi arogo nung yimsü asütsü jatetba lenirtem masü saka, tenzüktsü asoshi arogo lenirtem jatet. 1 Timoti 3:1-7 nung arogo nung lenirtem dak alitsüba jakla yimya Tenyar Paul ajanga zülua lir. Item jaklatemji tashishitsü maket, pei sasa azüoktetba, kibong aser tamang asoshi bendanga agütsütetba taküm asütsü nungdaker. Alimai Khristantem dak tamang katettsü asoshi ibala Temeshi Laishiba tesayuba dangi meyiptsü nungdaker. Tamakoktem angudang temulung shirangdaktsür, saka ano Tsüngrem akümtsübuba lenir tajung aika angudang parnokki tenzükba nung tasü ita temulung lemteta bilemer. Ochi shia tenzükba ajanga tanela kuli tajung agütsür, aser tanela jenjang tashi idaktsür. Iba tangatetba nung amangpurtemi lenirtem asoshi tanela nung nungita sarasademtsütsü kanga nungdak. Aser iba tanela tangatetba tajung nung kati ka ajungshiteptsü kanga dang tongtipang lir.

Khrista temangji telungjem asoshi jatet. Saka tanü iba temangji telemsa aser mokokachi agi sünga lir. Iba ama telok telemsa adokba asoshi Pauli Korinth nung aliba amangbapur artsü: Kechiyong kari "Ni Paul nübu" aser kari "Ni Apolo nübu" ta jembi tashi nung nenok shi nisung masü ama? (1 Korint 3:4). Telemsa adokba ajanga Khristai arogo telungjem asoshi sarasademba anema inyaker ta metettsüla (Yohan 17:21). Ano tebilemstsü tulu rongnung kin o kin na apusoba, takar sensaker bendanga amshiba, denomination balala toktepeba, aser Khristan ayak dang nungi alima ayak temaba jenjang nung ayutsü merangbatem ya lir. Arogo nung telemsa terayangdaktsüba ajanga temeim aser putetdaktsüba mapa ajema akümer. Tanü arogotemi chichiba Khristai tenyaba mapa nung rangloktsü nungdaker. Aser ibaji tanga masü saka Khrista sentsüwangshidaktsüba aser kin ajak pa nütsüng kümdaktsübaji lir.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# ABAM Sannükertem kükümshi sentong agi



**Impur, Aenjeti/January 22 (Agencies):** ABAM Church & Mission Ministry ajanga ayonga ABAM Lim Arogotem nung sannükertem asoshi kükümshi sentong ka Aenjeti (January) 20 & 21, 2025 anogotem nung Impur nung agiogo, ta ABAM Executive Secretary, Rev. Dr. Mar Pongener-i sangdong ka ajanga metetdaksü.

Alima tensa tia khenyongi melenshia temeteba agi atsünga mapa ajak inyakyima aodang, Arogotem nunga tanelar wadang den külemi ketdangsuba shilem balala nung lirumedema Tsüngrem aser meimchirtem tsüngda tashishitsü melii ochi tazüokba nung aotsü kanga tongtipang, ta angateta iba sentong ya agi.

Iba sentong nung Shisa Len

sayurtem- Prof. Dr. Imsütoshi, Clark Theological College ajanga "Asen Wadang Ora den Medemdangba" onük jembi aser Rev. Lanuyanger ajanga "Baptist Pastor Menden" onük jembi liasü.

Shisa tokden sentong ka agiba mapang, Mr. Imtisangba Pastor, Chümoukedima Ao Baptist Arogo, Rev. Süpongchiten, Pastor, Longsa BA aser Rev. Ponen Longchar, Pastor MTBA ajanga Sannüker Yimsüsüba Menden Tebilemtsü, Sannüker Tanülaren Tebilemtsü aser Sannüker Ketdangsubaren Tebilemtsü onük benoka shisa lemsatop mapang tajung ka agi.

Iba shisa tokden onir Dr. Akok Amer, Pastor, Impur Baptist Arogo liasü.

Senden shia nung

sannükertem nungi ajangshiba den tayongzükba o jembi liasü. Mr. Washimenba Pastor, Saringyim BA ajanga Sannükba wadang nung temoatsü, Rev. Sentiwapang Pastor, Unger BA ajanga Sannükba wadang nung ajangshibatem aser Rev Akangmongba Pastor, Yisemyong BA ajanga Kükümshidi Arung ta jembi liasü. Rev. Dr. Prof., Mar Pongener Executive Secretary, ABAM ajanga bendanga agütsüba sarasademba mapang agi.

Ajak agi Arogo 86 aser Fellowship 3 nungi Sannükertem 100 arua aden. Maneni Tsüngremer temoatsü nung Ao Arogotem tanelar wadang tulu inyaka aotsü sarasademer.

# Arogo 485-i timtemertem jenokdakja yarir

**January 22, 2025:** Tang asükwa mongpu nung Church of England (CofE) Arogo 485-i timtemertem Tenla kidang mesüra 'warm spaces' lapoka jenokdaksür aser Arogo aikati chiyungtsü-a agütsür.

Warm Welcome Spaces campaign kübok Arogotemi national network ka tenteta 'warm spaces' 5,000 dak tali lapoka lir. Warm spaces rongnung Tenla kitem, community halls, centres, cinemas aser libraries densema lir.

Diocese of Manchester nunga Arogo lenir ana Paul aser Gemma Tombling nati Wythenshawe area nung warm spaces asem achaayanger.

St. Luke's Church nung aliba warm space nung Paul aser Gemma nati Bread & Butter Thing charity telok den senteper timtemertem jenokdakja yarir. St Richard Arogo nung food bank ka lapoka lir aser St Andrew's Methodist Arogo aser William Temple Arogo nati senteper timtemer aser nungdabapurtem nem chiyungdaksür.

Gemma-i, "Ni sensak tia nung lia aruogo, anungji sensakertem timtemer ni junga angateta lir. Ni kanga sensaker kibong ka nung inet," ta ashi.

Gemma-isa, "Covid wara mapang nunga Arogotemi nüburttem akokba tashi yaria aruogo. Iba mapang nungjagi tenzüka Arogoi maneni timtemertem yaria arudar," ta metetdaksü.

Strood, Kent nunga St

Nicholas Arogo nung küm pezü tejaklen warm space lapoka liasü. Arogoi timtemertem aser azüngmeyaka aliba nüburttem yaria arudar. Covid wara mapang nungi tenzüka küm shia Arogoi asükwa mongpu nung warm space lapoker December ita nungi tenzüka March ita tashi sensakertem nem wifi, süngo tatsük aser angati chiyungtsü agüja arudar. Taoba Khristmas mongpu nunga Arogoi nungdakba kibong 100 nem sempet balala agüja liasü.

St Nicholas Arogo nung vicar, Rev. Sue Vallente-Kerr-i, "Nüburttem lenmang balala ajanga yaritsü atema onoki maongka bushir. Onoki March ita tashi warm space lapoktsü," ta ashi.

Somerset, Wells Cathedral nunga taküm agi küm asembuba 'warm rail' lapoka sensakertem nem süoshi talem den nungdakba osettsüset

agütsüdar. Cathedral indang café nung süngo aser coffee lema agütsür.

Ensburry Park, Bournemouth nung aliba St. Thomas Arogo nung 2022 küm asükwa mongpu nung 'warm space' lapoka liasü saka tangbo Arogoi küm piyong warm space lapoktsü telemtetba agiogo.

St Thomas Arogo nung vicar, Rev. Canon Simon Evans-i, "Onoki nüburttem yaritsü atema lenmang bushiba mapang nung onoki iba nungdak reprangteta liasü. Iba ya ajanga Khristan tamang- Yisu Khrista temeim sayur," ta metetdaksü.

ChurchWorks Commission nung chair, Philip Mounstephen-i, "Asen Arogotemi temeim mapa inyaka atema ni ajak nem tenüngsang agütsür. Khristan tamang aser Yisui kiyongertem meimtsü tuyuba ajanga ajungmeso Arogotemi temeim mapa inyaker," ta ashi.



Norwich nung aliba Arogo ka indang 'warm space' nung teintet rogo kar chiyungdang tangokba noksa nung angur.

# ANOGO ABEN TSÜNGREM DEN

## AJEMALUR TSÜNGREMI MOATSÜR

*"Pei sasa tazüngla kümer, alar ama küma nisung ama aküm...aser pei sasa ajemalu k?ma tasütsü oda kangki nung asütsüa tashi anga-a aküm." Filipi 2:7-8*

Tsüngremi nisung nem agütsübayam.rong nung Tsünuba aser tajungtibaji ajemaluba ya lir. Tsüngrem ajas chir Yisu-a iba aje injemaluba yagi sobua liasü. Aji oda chingremi dang masü nisungia ajemalurtem meimer aser Tukshir. Takar-a süang, sensaker-a süang ajemaluba melia ajaki sempar.

Item ajakji toktsür tamanger ka takümji ajemaluba taküm ke asutsüla. Ajemalutsü atema tongtipang jakla ana lir aser aji, tila akümba aser tashi angaba. Ajemaluba taküm ka akümtsü asoshi Yisui asenok dang pa taküm ajanga sayuogo.

Temeim adianutem, tila küma ajemaluba agi alima nung asen taküm temoatsü nung jangratema alitsü aser tangari asen meimtsü. Tanü azüngba lai nungji Yisui alar ama kümer ajemalua tashi anga-a aser kangki nung asütsü dena tashi angaba indang züngogo. Iba yongji kotak aser alima nung Tebu Tsüngremi pa nem tematiba tenüng agütsü.

Tamanger tajung ka ama Tsüngrem tsüngdang tashi anga-a ajemaluba takümji k?ma liteta litar ma? Ajemaluba ajanga takümji tesüngmangtsü taküm ka kümdaksür aser ibaji kümtettsü asoshi tashi angaba aser mulungsentsü temerük nungdaker. Asen mulungjang koma lir? Asen mulungjang memerüktet tashi ajemaluba takümji kodanga mekümtet.

## America nunger teimbakati pastor tem nemochi jembidaksüner

**January 22, 2025:** America nunger tamangertemi, sabang nungi jembidang pastor tem ajemalu sädaksüner, tasü itdaksüner mesüra o tsüngro songa jembidaksüner, ajisüaka parnok teimbakati pastor tem nem ochi jembidaksüner, ta Barna research ajanga metetdaksü.

Barna teloki iba study ya yaküm December 13 nungi December 22 tashi agia liasü. Iba survey nungji tainlonglong aser tain 2,005-i shilem agi.

Pastor mesüra putirtemi sabang nungi sayutsüngidang parnok dang nungi taginüba 15 rongnung kechisa tongtibang, ta parnok dang asüngdanga liasü.

Iba survey nung shilem agirtem teimtibai (shilem 48) shimbaji, sayutsüngidang pastor tem nem ochi jembidaksüner, ta ashi aser tanabubaji shisatsü (shilem 37) liasü.

Shilem 36-i aria bilemba, shilem 33-i temeim, shilem 32-i tamang katetba, shilem 25-i ajemaluba, shilem 25-i o tsüngro songa jembiba, shilem 21-i pei dak tamang kateta jembiba, shilem 17 onük tape, shilem 15-i tagütsünü, shilem 12-i nükjidong akaba, shilem 10-i odi-odia jembiba aser shilem 7-i tasü itta jembiba tongtibangba, ta ashi.

"Item ajak dangji alia onok research agirtemibo pastor temji chichiba sädaksüner," ta Barna researchers-i metetdaksü.

"Onoki agiba research ajanga aikati pastor tem nem ochishia jembidaksünüba bushiteter. Pastor temi asüyonga ajakbo memetet, ta nisung teimbakati meteta lir," ta parnokisa metetdaksü.

Tamalen Barna survey ka ajanga, pastor tem aikati pei wadang nung timtem ajurur ta bushiteta liasü. 2022 küm survey ka ajanga bushitetba agi, pastor tem shilem 35-ibo parnok Tsüngremer wadang nung ajemokba sülen ang Tsüngrem nungi tajaba tejangja meteta liasü, ta ashi.

**AO OSHI ANGAZÜKDAK:****TANÜ ANGAZÜKTSÜBA OJANG**

Tir Yimyim

**Tebentsür**

(n) bener arutsür (carrier)

\* Shiti tebentsür maliba agi mapang takangka meyoktet ayu.

**Teberem**

(n) temang tesülen terongdong o techimi na tsüngda (dorsum, back side of a body)

\* Teberem tashi aittsü atema anogo shia jajatsüla.

**OLONG PAITEP # 7043**

|    |   |    |  |    |  |   |  |    |
|----|---|----|--|----|--|---|--|----|
|    | 1 |    |  | 2  |  | 3 |  | 4  |
| 5  |   |    |  |    |  | 6 |  |    |
| 7  |   | 8  |  |    |  |   |  |    |
|    |   |    |  |    |  |   |  |    |
|    |   |    |  |    |  | 9 |  |    |
|    |   | 10 |  |    |  |   |  |    |
| 11 |   |    |  |    |  |   |  | 12 |
|    |   |    |  |    |  |   |  |    |
|    |   |    |  | 13 |  |   |  |    |
|    |   |    |  |    |  |   |  |    |
|    |   |    |  | 14 |  |   |  |    |
| 15 |   |    |  |    |  |   |  |    |
|    |   |    |  |    |  |   |  |    |
|    |   |    |  |    |  |   |  |    |

**TIPIEN**

|                       |       |                             |       |
|-----------------------|-------|-----------------------------|-------|
| 1. Balaka             | - (5) | 2. Hai sür inyak            | - (4) |
| 6. Aika shirangba     | - (4) | 3. Aor tenüing ka           | - (6) |
| 7. Tar tatsü          | - (6) | 4. Ali telungi talangka lur | - (5) |
| 9. Nenü'er jabaso     | - (4) | 5. Tebang kenyongi mazüoker | - (4) |
| 10. Sen latettsüba    | - (7) | 8. Ken atema anenzükertem   | - (5) |
| 11. Tangar kübok alir | - (4) | 9. Toktepa noktak           | - (5) |
| 14. Lon nung inokba   | - (6) | 10. Sen                     | - (6) |
| 15. Tzü ayimdak       | - (4) | 11. Benjong agi             | - (5) |
| 16. Ajok              | - (5) | 12. Telung nung rizünga ayu | - (4) |
|                       |       | 13. Tebang nung enok        | - (4) |

**LANGTSÜNGLEN****OLONG PAITEP # 7042 TELANGZÜBA****TIPIEN :**

1. Aben, 4. Artsü, 7. Lisem,  
8. Liwa, 9. Sarasadem,  
12. Aket, 14. Mangu, 15. Anünü,  
16. Ango.

**LANGTSÜNGLEN :**

1. Aruli, 3. Balala, 5. Suwar,  
6. Belem, 9. Sүjak, 10. Aonung,  
11. Dokan, 13. Tinu.

**NAI-A YA METETTER MA**

Pune nung aliba Deccan Education Society indang primary school (grades 1-4) kaketshirtemi January 18, 2025 nü yoga nung world record ka yanglutetogo. Kaketshirtemi minute 150 tsüngda yoga tapu balala 30 tashi ia sayu. Kaketshirtemi tangar dang nungi alia underwater yoga aser skating yoga ia sayu aser world record yanglutet.

Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimyim bureau tem nung agüjang.

Government of Nagaland  
Directorate of Health and Family Welfare  
Nagaland : Kohima

No. DHFW-13/DC/Recruitment-Lab/2024-25/

/Dated Kohima, the 22nd January 2025

**ADVERTISEMENT**

Applications are invited from willing candidates to work on contractual basis for a period of one year to fill the under mentioned posts under Nagaland State Drugs Testing Laboratory (NSDTL), Kohima, Nagaland.

The undersigned reserves the right to reject any or all applications without assigning any reasons thereof. Merely having the requisite qualification and experience will not render the applicant eligible for short-listing.

| Sl.No | Name of the post          | Requisite Qualification & Experience  | No. of posts | Remuneration per month |
|-------|---------------------------|---|--------------|------------------------|
| 1     | Analyst                   | <b>Essential :-</b><br>1. Graduate in Pharmacy from recognized University with 60 % marks. Preference will be given to candidates having Master in Pharmacy with specialization in Pharmaceutics or Pharmaceutical Chemistry or Pharmaceutical Analysis.<br>2. Age : 21 years to 37 years as on 31 <sup>st</sup> 12 2024<br><b>Desirable :-</b> Candidate having at least one year experience in testing of drugs and handling of HPLC, AAS, UV Spectroscopy etc.<br><b>Job Description:-</b> Perform routine and sub-professional chemical analysis and tests on a wide variety of samples, also test new methods of analysis for future laboratory use. Records finding, shall declare the status of equipment/ instruments. Shall validate/re-validate the standardization of chemicals and reagents. Shall store the raw data/ worked out data. Shall be responsible for archival and retrieval of test and analysis data of the drugs. He or she shall be responsible for any other work assigned by Laboratory In-charge. | 04           | Rs.30,000/-            |
| 2     | Laboratory Assistant      | <b>Essential :-</b><br>1. Candidate should be a Graduate in Science with Chemistry as one of the Subject.<br>2. Preference will be given to such candidates having experience in a testing laboratory.<br>3. Age : 21 years to 37 years as on 31 <sup>st</sup> December 2024.<br><b>Job descriptions :-</b> Perform laboratory test, prepare samples, reagents and produce accurate and reliable data. Follow procedures, adhere to safety guidelines and maintain equipment. These duties will be carried out by the candidate under the supervision of the Analyst and will also be responsible for any other work/duties assigned by the Analyst.  | 02           | Rs.18,000/-            |
| 3     | Office Assistant          | <b>Essential :-</b><br>1. Candidate should be a Graduate in any field with high proficiency in Computer Application.<br>2. Preference will be given to such candidates having experience in a general office management and accounts matter.<br>4. Age : 21 years to 37 years as on 31 <sup>st</sup> December 2024.<br><b>Job description :-</b><br>1. The Office Assistant shall be responsible for management of the general establishment section of the laboratory.<br>2. The Office Assistant shall assist the Administrator, who shall be an Officer from Drugs Control Administration of the Laboratory.<br>3. All office records shall be maintained.<br>4. He/she shall also be responsible for the management of accounts matter of the laboratory.   | 01           | Rs.15,000/-            |
| 4     | Data Entry Operator (DEO) | <b>Essential:-</b><br>1. Candidate should be a Graduate in any field with Diploma in Computer Application.<br>2. Preference will be given to such candidates having experience in a digital data management.<br>Age : 21 years to 37 years as on 31 <sup>st</sup> December 2024.<br><b>Job description:-</b><br>1. Generating data reports, spreadsheets and documents as needed.<br>2. Maintenance of all data with respect to sample receipt and test results digitally.<br>3. The Data Entry Operator shall be responsible for the uploading of data with respect to online reporting.<br>4. Ensuring the accuracy, consistency and quality of data input. This includes cross-checking data to identify and fix errors.   | 01           | Rs.15,000/-            |

**Note :-**

- The contract service period will be for 1 year with possibility of further extension subject to the satisfactory performance.
- The service shall be co-terminus and the candidate shall not claim for regularization of the service.
- In the event of multiple candidates obtaining same marks after interview, final selection will be made based on the merit of the educational qualification.
- The application form can be collected from Drugs Control Administration Building, DHFW, Nagaland Kohima from 27th January, 2025.
- Last date for submission of form is 31st January, 2025.
- Shortlisted candidates and date of interview will be uploaded in the Department Website: <https://nagahealth.nagaland.gov.in/> and also displayed in the notice Board of Drugs Control Administration (DR.E.MOTSUTHUNG PATTON)

Principal Director  
Directorate of Health and Family Welfare  
Nagaland : Kohima.

# Indonesia anentsüh nung asür 19 jungogo



**Jakarta, Aenjeti/January 22 (Agencies):** Indonesia kübok Central Java province nung anentsüh lendong nung asür nisung 19 jungogo aser tekümkürtemi taküm alirtem maneni bushidar.

Pekalongan nung tzunglu kanga sashia aruba ajanga Mongolbarnü anentsü tulu ka alua yimti aser alimapenzürtemi kanga bulua semdangba Dieng plateau na sendaktepba lenmang tongtiba anenbanga liasü.

Local media nung video tem ajanga anentsüh agi kongshir aliba lenmang aser ki o tziük lutem lishi, jana aser long agi nembanger aliba sayuogo.

Lenmang nung senzusenpong majungba ajanga tekümkürtemi anentsüh alur aliba tesem tonga aotsü atema kilometer

pezü shi jaja oa liasü. Lenmang nungi lishi nongintsü atema excavator ka yokogo, saka tzunglu aruba aser tziüsü alongba agi inyakyim nung tetsükdaksü adoker.

"Search and rescue team-i Bodhbar anepdang tasü mang ana ngutetogo. Tanü nikonngsütsü tashi nung asürtem 19 ajungba mangaoka yuogo," ta National Disaster Mitigation Agency (BNPB) otongdar Abdul Muhari-i ashi.

"Tanep anguba tasü mang ana ya samara bushia alirtem rongnung densema liasü," ta otongdarisa shisem.

Search and rescue agency Basarnas-i Bodhbarnü ashiba agi, lendong nung nisung 13 yiruogo.

Tekümkürtba maparen atema lenmang

merektetsütsü atema machine tulu yokogo aser tekümkürt 200 teyari maparen balala atema yokogo, ta local ketdangsür Mohammad Yulian Akbar-i ashi.

"Lendong nung densema alirtem dak rangloker inyakdar," ta pai ashiba den, local sorkari district nung hopta ana atema emergency sangdongogo, ta shisem.

Disaster agency-i lemsatepba noksatem ajanga tekümkürtemi tasü mang yangku nung bener aoba sayuogo.

Agency-isa, iba tesem nung alirtem dang ano taruba anogo ishika tzunglung arutsü aser iba ajanga anentsüh timba aludaksütsü aser tziushi dena aludaksütsü akok ta tekümdangtsü metetdaksüogo.

## Hezbollah commander Sheikh Hammadi khaset

**Beirut, Aenjeti/January 22 (Agencies):** Hezbollah commander tejen Sheikh Muhammad Ali Hammadi, shiba FBI indang most-wanted list nung liasü, pa Mongolbarnü Lebanon anütoklen par ki jakdang khaseta liasü, ta Lebanon nung osang kaket Al-Akhbar-i metetdaksü.

Osang ajanga ashiba agi, Hammadi shiba Hezbollah indang western al-Baqaa region commander liasü pa ya nisung telok ka gari ana nung arur khaseta liasü.

Hammadi kechiba tepset iba indang kuli tejangja memetet. Local osang balala ajanga ashiba agi, kinungertem yongtsü nung mangatetep aliba ajanga pa tepsettsü asütsü akok, ajisüaka kuli tejangja mali. Kija mesüra telok kichaia pa tepsetba nangzüka mali.

Hammadi, shiba küm aika FBI indang most-wanted list

nung liasü, pa ya tesem balala amakba nung densema liasü. 1985 küm pai West German airliner, Lufthansa Flight 847 hijack asü, kong America nung densema passenger 153 mena liasü.

Hijack asüba mapang America nung ka danga metepset mesür rishikangshi masü. Anüolen aliba linüktem anema inyaksangshiba nung shilem agiba ajanga Hammadi ya FBI indang most wanted list-i ia liasü.

Hezbollah pur Israel den mangatetep adoker mepetmesü tulu nung aliba mapang tang Hammadi tepsetogo. Iba telok ya Hamas den külemi Israel den rara arudar aser iba mapang tongtibang Hezbollah commander tepet tashi tepsetogo. Israel-i Syria aser Israel nung communication equipment tem detonate sütsüba densema Hezbollah indang supply chain amakba

sülen mepetmesü tamajungba küma ao.

Israel military-i West Bank nung meita aoba sentong balala benoka inyakba densema tesem balala nung azütokshi lendong ataloka oya aliba mapang ka nung tang Hezbollah lenir tejen ka ya tepsetogo.

Israel nung ketdangsürtemi Jenin yimti amakba mapang Palestine nung teku tepsetba aser nisung aika yiruba metetdaksüogo. Israel aser Hezbollah-i teyari agütsüba telok tsungda southern Lebanon nung ceasefire benoker aliba mapang military-i tang iba jenjang agidar.

Kasa mapang nung ita 15 tashi rara aka Hamas puri Gaza kanga junga azüoka lir. Ceasefire benokba sülen Gaza nung Palestine nung aika pei kidangi meyipa oaka talidak maka kümogo.

## NAME CHANGE

I, **Jeena Basnet**, d/o Dhan Bahadur Basnet resident of Toribari, Kangpokpi, Manipur do hereby declare that my mother name has been wrongly recorded as **Kousila** in my Birth Certificate and Passport (No.C3453449). However my mother's correct name i.e **Mrs Kaushila Basnet** has been recorded in all other relevant documents.

Sd/-  
**Jeena Basnet**

## Palestine nung nisung 10 tepset

**Jerusalem, Aenjeti/January 22 (Agencies):** Israel sepaitemi occupied West Bank kübok Jenin area nung operation tuluka agidang Palestine nung nisung 10 shi tepset aser 40 jungnua yirutsü, ta Palestinian health ministry ajanga ashir.

Palestine nung media ajanga ashiba agi, Mongulbarnü sepaia aika yimti aser refugee camp telungi nungboka ait aser iba mapang tayimtsü amshia amak aser drones, helicopters aser armoured bulldozers temi yaria liasü.

Israel indang ato kilonser-i ashiba agi, Jenin nung kiralongrar madak takok angutsü mechi operation tongtipang aser tulu agi, kong Palestine nung telungpur tashi ita aliba mapang talangka nungi repranga aru.

Ibai Gaza nung ceasefire tenzüker anogo asem lir ataloker aser West Bank nung ano azüdokshi tali alitsü sayur, kong Israeli settlers südi ta temulung melemi alirtemi Hombar aonung ki o jen raksaja ao.

Jenin indang governor Kamal Abu al-Rub-i osangbener dang "Yangi kechi ataloker, ibai camp amakba lir. Kanga kera aru, anung nung Apache (helicoptes) aser tesem ajaklen Israel mitkar indang gari tem lir," ta ashi.

Palestinian news agency Wafa-ia Israel sepaitemi Jenin camp sapangogo aser armoured bulldozers temi lenmang aika tutetogo ta ashi.

Israel-i injang khaloktsüba nung yirurtem rongnung doctor asem aser nurse ana dena lir, ta Jenin indang government hospital director Wissam Bakr-i ashi.

Mongulbarnep Israel sepaitem marudang Palestinian security personnel tem Jenin refugee camp temeket nungi ainshir liasü ta ashir.

Palestinian security forces indang odongtar Brig-Gen Anwar Rajab-i ashiba agi, Israel sepaitemi civilian aser security forces dak injang khaloktsü aser iba mapang

nisung aika yiru.

Mongulbar nikongdang Palestinian health ministry ajanga sangdong ka nung Israel sepaitemi Jenin nung tebur toku aser arishi küm 16 tain teburchanu Mutaz Abi Tbeikh tepset.

Iba yimti nungi north-west tsütsü kilometre ti shi pilar Tianik yimtsü nunga Israel sepaitemi nisung ka khaset ta ashi.

Israel Ato Kilonser Benjamin Netanyahu-i Mongulbarnü sangdong ka nung, "Iron Wall" nungja agüja aliba Jenin operation ya West Bank nung nükjidong tongtetsü mera tali agiba aser security tashi ulushiba lir, ta ashi.

"Iranian axis anema parnoki atongdak Gaza, Lebanon, Syria, Yemen aser West Bank nung temulungtetba tulu nung inyaker aser onok tang tashi shidak lir."

Iran-i Hamas, Palestinian Islamic Jihad aser West Bank nung telungpur nem nok-nü aser senotsü teyari agütsür ta Israel-i tai tongloktsür.

West Bank nung amenoka aliba Palestinian Authority indang Ato Kilonser Mohammed Mustafa-i Jenin refugee camp amakba aitsü aser ibai West Bank nung Palestine nung anema Israel-i tashiyim amshia mera agiba rongnung tesüsa alitsü ta ashi.

Jenin operation nung telangzüba agüja Hamas aser Palestinian Islamic Jihad temi West Bank nung aliba Palestine nung dang Israel anema tali amaktsü ayongzüük.

Taoba mapanga Jenin nung Israel mitkari operation aiben agia lir.

Hamas-i October 7, 2023 nü Israel amakba sülen West Bank nung azüdokshi tali kumogo.

West Bank aser Israel nung Palestine nungeri Israel nung dak amakba azüoktsü meranga Israel sepaitemi West Bank nung tesem balala meita aodang Palestine nung noklang aika takum samatsüogo.

## Swiatek, Keys, Shelton semifinal-i iogo



Iga Swiatek

**Aenjeti/January 22, 2025 (Agencies):** Bodhbarnü Australia Open tetsü kija asaya nung Grand Slam pongu tashi koker alila Iga Swiatek-i Emma Navarro koka semifinal-i iogo, kong la Madison Keys den asayatsü.

Quarterfinal asaya nung Poland tsürüla yagi kanga junga asaya-a Rod Laver Arena nung lai America tsürüla ya 6-1, 6-2 agi ayong ayonga koka liasü.

Lai 2022 kuma Australian Open nung semifinal tonga asayaogo, ajisüaka la Danielle Collins-i tsükdakja liasü.

Brehostibarnü Sabalenka-i semifinal nung Paula Badosa mekokra Swiatek ya tetsürtem rongnung number one asayar akümtsü.

Kasa mapang nung Swiatek aser Sabalenka naprongla final-

i tura takoker number one asayar ama Australia toktsür aotsü.

Tetsür kija semifinal asaya tanga ka nung Madison Keys-i set ka mekoki aliba nungi meyipa tur Ukraine tsür Elina Svitolina 3-6, 6-3, 6-4 agi kokogo.

Seed 19buba nung aliba America tsürüla ya Melbourne Park nung tang agi tasembenbuba semifinal-i iogo.

Keys, shiba taruba ita arishi küm 30 ajungtsü lir la tang asaya aliba season nung WTA Tour 12 koka lir aser Adelaide title abenba sülen la asaya 10buba khen danga tamakok mongui asaya arudar.

Keys-i Bodhbarnü quarterfinal asaya ya ghonda ka ser minute 53 nung koka liasü.

Kasa asayamung tebur kija



Madison Keys



Ben Shelton

asaya nung Ben Shelton-i Bodbnarü Italy nung asayar Lorenzo Sonego koka tang mezüngbuba Australian Open semi-final tongogo.

America nung asayar yagi Melbourne Park nung quarterfinal nung Sonego ya 6-4, 7-5, 4-6, 7-6 (7/4) agi koka liasü. Pa semifinal nung defending champion Jannik Sinner mesüra Australia nung asayar Alex de Minaur den asayatsü.

Iba asayamung mezüngbuba round nung Shelton-i Stan Wawrinka tsükdaktsü aser iba sülen NextGen champion Joao Fonseca tsükdakja liasü. Maneni pai round pezübuba nung arishi küm 19 tain Learner Tien tsükdaktsü, shibai Medvedev koker liasü.

## Borussia Dortmund-i coach Nuri Sahin mapa nungi anentsüogo

**Aenjeti/January 22, 2025 (Agencies):** Mongolbarnü Champions League nung Bologna goal 2-1 agi makokba sülen Borussia Dortmund-i coach Nuri Sahin mapa nungi anentsüogo aser Bodhbarnü ashiba agi, parnoki pa dak tamang makateti kümogo.

Dortmund pur taoba küm CL final tonga asaya saka Mongolbarnü tamakok anguba ya parnok tetoktepa ajak nung asaya pezübuba atonga tamakok anguba liasü.

Bundesliga nung Dortmund pur tang 10buba nung lir aser parnoki temaba jenjang nung aliba Bayern Munich point 20 agi memenepi lir.

Sahin ya taoba season Dortmund pur mimali lia Champions League final tonga asayaba mapang taoba coach Edin Terzic indang assistant liasü aser taküm head coach aküm. Champions League final nung parnok Real Madrid-i koka liasü.

"Tia maka onoki onok nükjidong metongtetsü ta tamang makai kümogo," ta sporting CEO Lars Ricken-i ashi.

Ricken-isa, iba telemtetba agitsü temela masü asü, saka Bologna den asayaba sülen agitsüsa dang aküm, ta ashi.

"Onoki Nuri Sahin aser pa

mapa kanga senti süa agir aser pa den mapang talangka longjemer inyaksü imla liasü aser tatem tashi onoki temelenshi kabo adoktsü ta imla aruogo," ta paisa shisem.

Dortmund pur Honibarnü league nung Werder Bremen den asayatsü lir aser parnoki tang tashi nung coach tasen ka shima mali.

German media sangdong balala ajanga pa melena taoba mapang Manchester United coach Erik Ten Hag shimtsü ako ta shiogo, shiba tawa Dortmund asaya reprangba nguogo. Dortmund-i ano taoba mapang Benfica aser Bayer Leverkusen manager Roger Schmidt shimtsü akok.

Sahin-i ashiba agi, tia maka pai tang mapang nung Dortmund pur nükjidong tongtetsüsa minyakteti liasü.

Mongolbarnü tamakok anguba sülen Sahin-i osangbenertem dang, "tebilemtsüji ni süra, mesüra coach melenba ajanga ken o bentetra kecha masü," ta ashi.

Sahin lenisüba nung tang asaya aliba season nung Dortmund puri asaya teku makok aser asaya 15 nungi pezü dang koker lir.

Maneni Sahin-i aniba team ya German Cup nunga Wolfsburg-i tsükdakja liasü.

## Nagaland aser Goa na Plate Group final asayatsü



### RANJI TROPHY

**Dimapur, Aenjeti/January 22 (TYO):** Nagaland Cricket Association-i sangdong ka ajanga Ranji Trophy 2025 Plate Group Finals nung Nagaland team Goa den asayatsü ta metetdaksüogo.

Iba asaya ya January 23 nü nungi tenzüka January 27 nü tashi Nagaland Cricket Stadium, Sovima nung asayatsü.

Iba asaya ya Nagaland cricket team puti otsü nung kanga nemadangsü mapang ka

lir, kechiyong team nüngtugu Ranji Trophy Plate Group final atongba sülen 2025-2026 season nung elites team tem den asayatsü atema qualify süogo. NCA-isa, Nagaland nung cricket asaya meimertem dang iba asaya arua reprangtsü pelashishia jaokogo.

Plate Group title atema team ana ya anogo pongu tashi temaba jenjang nung toktepa angutsü.

Goa team ya Head Coach Dinesh Mongia aser Captain Darshan Misal na lenisüba nung

asayatsü aser Arjun Tendulkar, Suyash Prabhudesai, KV Siddharth aser Snehal Kautankar nung amala asayar tongtibangtemi shilem agitsü.

Kasa mapang nung Nagaland team Head Coach Debashish Mohanty aser captain Jonathan Rongsen na lenisüba nung asayatsü aser team nung Suchith J, Nischal Dega, Chetan Bisht, Imliwati Lemtur, Sedezhalie Rupreo aser Hokaito Zhimomi nungera densema lir.

## Manchester City-i Reis alizükogo

**Aenjeti/January 22, 2025 (Agencies):** Manchester City-i, Brazil club Palmeiras nungi defender Vitor Reis den küm pezüser tesadang atema tenanzüktep ka yangluogo, ta Premier League club yagi Mongolbarnü metetdaksü.

Reis ya Palmeiras nung youth team nung asaya tenzüik aser 2024 küm mezüngbuba senior team nung asayaba sülen parnok Brazilian Serie A nung tanabuba jenjang tonga asayaba mapang pa team nung asayar tongtibang ka aküm.

Reis-i ashiba agi, Manchester City nung adenba ya nükjidong atalokba ka lir. Uzbek nung Abdudukodir Khusanov alizükba sülen City-i January transfer window nung tang Reis alizükogo.

"Taoba küm ishika ni Manchester City asayaba repranga aruogo. TV nung onoki Manchester City dang repranger anungji tanurtem shirnoki football asaya meimer

parnok ajaki Manchester City reprangdar. Manchester City-i asüngdangba mapang kechi südir süaka adentsüla ta ni meteta liasü," ta Reis-i ashi.

Pa Palmeiras nungi 22 ben asayaogo, kong league asaya 18 aser Copa Libertadores nung asaya ana asayaba densema lir.

Reis ya position aika nung asayatetba defender ka lir aser pai centre back aser right back nung kanga ayonga asayar. Pa ya Real Madrid densema Europe nung club aikati kanga aginüa liasü.

Brazil nung Fernando aser Gabriel Jesus shirnok Palmeiras nungi arua liasü, parnokia Guardiola kübok City nung kanga takok ngua asayaogo aser Ederson o Savinho na maneni City nungi asayadar.

Reis ya tang club nung kulem lanur asayar Abdudukodir Khusanov (20) den asayatsü, shiba Lens nungi arua Hombarnü City nung denogo.

### BILEMDANGANG

"Tasürtemiang rara tatembangji angur."